



Glygge-Zyttig vo de
JOKER WAGGIS

Usgoob 12 - im Oggtober 2017

Miir iibernämme

Dii Event - unseri Sach SYTTE 3



Unter der Lupe

Der Thomas

SYTTE 2



Wettbewäärb

S'git ebbis z'gwinne

SYTTE 3



E neue Event het voll yygschlaage:

Garage-Bar-Oobe

Am 29. Septämber 2017 isch zem
erschte Mol der Garage-Bar-Oobe
iiber d'Biini gange. Dää brandneu
Aalass het - wie's der Naame sait -
in unserer Garage in Birsfælde
stattgfunde. Nachdäm bereits
d'Waage-Yyweihig 2017 vo de

JOKER WAGGIS het kenne in der
renovierte Garage duuregfiert
wärde, het die in de vergangene
Monet der ändgiltig Fyynschliff
griegt. Esoo stoot wytere Events
in Zuekunft aigentlig nit mee im
Wääg.



E Schnappschuss vom 1. Garage-Bar-Oobe: Muusig, Dringgs, Snacks ... und gueti Luune!

Dass es iiberhaupt zue soneme
Aalass het kenne koo, het rund vor
eme Joor syy Ursprung gha. Bereits
in der Usgoob 10 vom **72stunde**
isch iiber die usfierigeri Garage-
Sanierig bzw. unseri "Visioon
Schmuggstigg 2017" informiert
worde. Doch das isch erscht der
Aafang gsi ... denn nach em Dach,
de Dachfänschter und der
Garage-Yyfaart, isch unsere
Wunsch mee z'bewirge,
allewyyl gstiige.

Syt miir's gschaftt hän,
s'Dach sowyt dicht
z'griegen, hän sich im
Garage-Innere ganz neu
Meegligkaite uffdo. So
isch es jetz au meeglig
gsi, d'Wänd mit Dääfer
z'verglaide. Und esoo het me jetz au
e Variante gfunde, der dailwyys
marodi Verputz aifach z'verdegge
anstatt Stigg fir Stigg uszbessere.

Die gmuurte Stelle, wo no guet im
Schuss gsi sinn, het me allerdings
nit welle verliere. Esoo e Baggstai-
Wand het ebbe scho e gwisse Raiz.
Drum hän miir die kompletti
Sytte wand vom räschtlige Verputz
befreyt und dernooch mit wyss
iiberstriche. D'Mischig vo gmuurter
Wand zem aine und em Dääfer zem



Was fir e Unterschiid - der Bar-Egge vor em Umbau ...

andere, bringt schlussändlig e
haimeligi und glichzyttig modääri
Atmosphääre in Ruum.

WYTER SYTTE 2

FORTSETZIG

Zwar isch das zerscht gar nit der Gedangge gsi derhinter, denn in erschter Linie het's miesse fir e Waagebau funggzioonal syy. Doch scho bald isch d'Ydee uffkoo, me kennt grad no e Bar baue, wenn me scho derby isch. So wär der Raum au fir Glygge-Sitzige o.ä. nutzbar. Nadyrlig het me sich das nit lang miesse iiberleege!



... und e paar Wuche speeter, scho mit em Bar-Roobau.

Mit der Bar sinn denn wiiderum neu Ydee und Wunsch uffkoo. So het me sich als näggschts an die dringend neetig Erneuerig vo der zuenäämend

in d'Joor grootene Stromversorgig gmacht. Alti Laitige sinn duur neu Fyysicheri ersetzt worde. Glichzyttig het me die bestehende Lampe versetzt und Zuesätzlig montiert, wo s'Schaffe aagnäamer mache solle. Bis uff e richtigi Haizig und fliessend Wasser, het die Garage jetz aigentlig alles, wo's bruucht zem gliggig syy.

No vor der Fasnacht 2017 isch drum bi de JOKER WAGGIS der Gedangge koo, die frisch renovierti Garage au fir offizielli Aaläss z'bruuche. Denn numme fir unseri Glygge-Sitzige isch sii z'schaad!

Und was wär doo noohelligender gsi, als die tradizioonelli Waage-Yyweihig in der Garage z'mache?!? Dää Event, wo allewyyl in unserem



Der erscht Aalass in der Garage: Waage-Yyweihig 2017

Partyzält uff em Parkplatz vor der Garage stattfunde het, het dermit e neu Gresseoornig erraicht.

Kai Wunder hän d'JOKER WAGGIS - wie me das langsam gwoont isch - nomol mee welle. Scho bald isch also glaar gsi, es soll e Garage-Bar-Oobe gää! Am 29. Septämber 2017 isch es denn sowyt gsi. Und dangg em groosse Interässe vo Euch, isch au dää Aalass e Erfolg worde.

Ere Neu-Ufflaag vo däm Aalass im 2018 stoot kuum ebbis im Wääg.

Unter der Lupe: Der Thomas

In dääre Rubrigg wird allewyyl ai JOKER genauer voorgstellt. Diesmol nämme miir unsere Glygge-Oldie - der Thomas - unter d'Lupe.

72stunde: Wie alt bisch Du?

Thomas: Ich bi 41.

72stunde: Wo bisch Du dihim?

Thomas: In Möhlin

72stunde: Was machsch brueflig?

Thomas: Ich bi glernte Disponänt und Spedizioonskaufmaa. Mittlerwyyle bi ich syt fimf Joor bi de Firma Interfracht in Prattele als Teamleader däätig.

72stunde: Was machsch Du in Diiner Freizyt?

Thomas: Nääbe de JOKER WAGGIS mach ich seer gärn Sport. Am liebschte Fitness, Jogge oder Veloafaare.

Aber au mit mim Deff bi ich seer gärn unterwägs.

72stunde: Syt wenn bisch Du bi de JOKER WAGGIS?

Thomas: 2014 bi ich als Aawäärter zue de JOKER WAGGIS gstoosse. Und 2015 isch mii erschti Fasnacht gsi.

72stunde: Und wie bisch zue de JOKER WAGGIS gstoosse?

Thomas: Ich ha der Galli vo miiner Zyt im Militär kennt. Wo im 2014 e Platz uff em Waggiswaage frey



worde isch, het er mii aagfroogt, ob ich Interässe hätt, uff eme Waage Fasnacht z'mache. Am Muttenzer Banndaag 2014 bi ich de andere Glygge-Mitglieder voorgstellt worde.

72stunde: Was isch Dii spezielli Funggzioon bi de JOKER WAGGIS?

Thomas: Nach em Usdritt vom

Mathias, ha ich syyni Uffgoobe iiberno - d'Organisazioon rund um d'Lägerli. Zuedäm bi ich no zueständig fir d'Nachtässe am Fasnachts-Mäntig und -Mittwoch. Das isch gar nit esoo aifach, denn d'Aasprich vo de JOKER WAGGIS sinn zem Dail rächt hoch! Und sunscht versuech ich, mii z'bedailige wo ich ka. Will ich 100% schaff und elaierziend bi, isch das hald nit allewyyl meeglig.

72stunde: Weeles isch Dii bishär scheenschts Erläbnis mit de JOKER WAGGIS?

Thomas: Die erschti Fasnacht, mit all de Impressioone uff em Waage (isch doch ebbis anders, wie mit der Drummele duur d'Stroosse zie), der Daufi zur Uffnaam als Mitgליid, aber au der Zämmehalt bi de JOKER WAGGIS, wo als wie greesser wird je neecher d'Fasnacht ruggt.

72stunde: Was sin Diini Wunsch fir d'Zuekunft bi de JOKER WAGGIS?

Thomas: Ich winsch miir, dass miir uns allewyyl wyter entwiggel, esoo wie das bim "Schmuggstigg 2017" ungsetzt worde isch. Und mii spezielle Wunsch isch, emol e Sujet z'finde, wo e Ueli derzue passt. Und jää, Stephan, mit ächte Gleggli und zwar die Groosse und doo dervo ganz e Huffe! :-)

Hesch Du e Fescht zem Organisiere, duesch d'JOKER WAGGIS engagiere

In de vergangene Joor hän sich d'JOKER WAGGIS e ordentligs Wissen im Organisiere vo Events

Alles het nach der Fasnacht 2010 aafange, wo miir entscheide hän, uns e aigenes Partyzält zuezelege. An der Muttenzer Fasnacht 2011 hän miir das denn s'erscht Mol im Ysatz gha. Syt der Fasnacht 2014 und em neue Standort vor der Dorfkirche, isch sogar no e zwais Partyzält derzue koo.

Hitte sinn die nimm wäg z'dängge - und das nit numme fir aigeni Aaläss. Fir Feschter jeeglicher Art hän miir unseri Partyzält scho bryswäärt zer Verfielig gstellt.

Dangg de verschidene Gressene isch fir jeede ebbis derby ...

Wäm das nit längt, biete miir syt däm Joor mit unserer Garage-Bar neu e vollständig yyrichteti Ertligkait aa. Syt der Fertigstellig vor wenige Monet hän miir die bereits

aagaignet. Glichzyttig het me sich s'heetige Inventar zuegleegt oder sälber aagefertigt. Doch au

bi zaalryche Aarbets-Ysatz het me kenne zaige, was me ka!
Und was derfe miir fir Dii mache?



Unseri Partyzält im Ysatz am 20 Joor-Jubiläumsfescht vo der WGB Rote Leu in Muttenz

kenne für fremdi Aaläss vermiete. Vo Frielig bis Herbst ka me mit uns fir Aaläss bis zu 50 Persoone au kurzfristig e Leesig finde. Aber au greesseri Events sinn nach ere

Apsprooch sicherlig machbar. Doo derby ka me d'Art vom Aalass individuell plane - aber zwai vo uns JOKER WAGGIS wärde allewyyl vor Ort syy. Oder me vertraut d'Organisazioon vom Aalass grad vo A bis Z uns aa, ganz unter em Motto: "Dii Event - unseri Sach".

Doch das isch immer nonig alles! Au fir Aarbets-Ysatz wo's ebbis aazpagge git, sinn miir uns nit z'schaad. Egal was, mir mache das!

Hesch Du jetz Interässe griegt? Kai Problem. Uff unserer Homepage findsch unter "Joker Lädeli" wyteri Uskinft und Kontaggt.

Blibt also numme no ains z'saage: "Und was derfe miir fir Dii mache?"



D'Rue vor em Sturm - unseri Garage-Bar wartet uff Gäscht vom ene Geburtsdaags-Fescht



S'git ändlig wiider ebbis z'gwinne

**In dääre Usgoob vom 72stunde ka me wiider emol ebbis gwinne!
Diesmol verlose miir e Konsumazions-Guetschschynn fir unseri JOKER BAR
an der Muttenzer Fasnacht 2018 fir die richtigi Antwort ...**

Folgende Froog hän miir fir Dii parat:

Am 29. Septämber 2017 het bekanntlig unsere Garage-Bar-Oobe stattgfunde.

Miir wänn jetz vo Dir wisse, zem wiewyylte Mol bereits?

(nitzligi Informazioone findet me au in dääre Usgoob und uff unserer Homepage)

Dii Antwort schiggsch Du bitte bis speeteschtens 30. Novämber 2017 per Mail an: redaggzioon@joker-waggis.ch